

ÁRSSKÝRSLA 2018

Starfsáætlun 2019

**FRÆÐSLUMIÐSTÖÐ
VESTFJARÐA**



Fræðslumiðstöð Vestfjarða
Miðstöð símenntunar á Vestfjörðum

Fræðslumiðstöð Vestfjarða
Kennitala 511199-2049
Suðurgata 12, 400 Ísafjörður
Heimasíða frmst.is
Netfang frmst@frmst.is
Ársskýrsla 2018 og starfsáætlun 2019

Mái 2019

Efnisyfirlit

Efnisyfirlit.....	3
Fræðslumiðstöð Vestfjarða	5
Stjórn Fræðslumiðstöðvar Vestfjarða árið 2018	6
Fulltrúar Fræðslumiðstöðvar í öðrum stofnunum	6
Starfsfólk Fræðslumiðstöðvar Vestfjarða árið 2018.....	7
Kennarar og leiðbeinendur.....	8
Fyrrum nemendur og reynsla þeirra	8
Starfsstöðvar og starfsaðstaða	10
Ísafjörður	10
Hólmavík.....	10
Patreksfjörður.....	10
Rekstur Fræðslumiðstöðvar Vestfjarða.....	11
Formlegir samstarfsaðilar.....	11
Mennta og menningarmálaráðuneytið	11
Fræðslumiðstöð atvinnulífsins – Fræðslusjóður	11
Háskólaþing Vestfjarða	12
Fjölmenn	12
Virki og Starfsendurhæfing Vestfjarða	12
Gæðavottun	12
Námið	13
Fjöldi þátttakenda	13
Fjöldi nemendastunda.....	14
Aldurskipting þátttakenda.....	15
Flokkun þátttakenda eftir kyni	15
Skipting eftir búsetu	16
Vottaðar námsleiðir.....	17
Réttindanámi.....	18
Íslenskunámskeið fyrir útlendinga	18
Almenn námskeið.....	19
Fullorðinsfræðsla fatlaðra	20
Þjónusta við fyrirtæki	20
Fræðslustjóri að láni.....	20
Fræðsla í fyrirtækjum	21
Þjónusta við Vinnumálastofnun Vestfjarða.....	21
Náms- og starfsráðgjöf/Hvatningarviðtöl.....	21



Raunfærnimat	21
Þróunarverkefni.....	21
Nýjungar árið 2018.....	22
Starfsáætlun 2019	23
Starfsmarkmið fyrir árið 2019	23
Fjárhagsáætlun 2019	24
Vottaðar námsleiðir.....	25
Náms- og starfsráðgjöf	25
Raunfærnimat	25
Íslenska fyrir útlendinga	26
Samstarf við Fjölmennit	26
Lokaorð.....	26

Fræðslumiðstöð Vestfjarða

Hér gefur að líta 19. ársskýrslu Fræðslumiðstöðvar Vestfjarða og er henni ætlað að lýsa starfsemi og verkefnum miðstöðvarinnar árið 2018. Einnig fylgir starfsáætlun fyrir árið 2019.

Fræðslumiðstöð Vestfjarða er sjálfseignarstofnun sem hefur það markmið að efla menntun á Vestfjörðum og þá einkum að standa fyrir fræðslustarfsemi sem ekki heyrir undir námskrárbundið nám á grunn- og framhaldsskólastigi, nema sérstaklega verði um það samið. Í þessu sambandi skulu þarfir atvinnulífs og íbúa sérstaklega hafðar í huga. Lögð skal áhersla á að sem flestir íbúar Vestfjarða hafi aðgang að þjónustu Fræðslumiðstöðvarinnar óháð búsetu. Fræðslumiðstöðin hafi enn fremur forgöngu um fjarkennslu á sem flestum sviðum.

Helstu verkefni sem starfsfólk Fræðslumiðstöðvar Vestfjarða sinnti á árinu 2018 voru:

- Umsjón með námsleiðum Fræðslumiðstöðvar atvinnulífsins
- Skipulagning og hönnun námskeiða
- Umsjón með almennum námskeiðum
- Hvatningarviðtöl/ráðgjöf
- Raunfærnimat
- Markviss þarfagreiningar
- Ráðgjöf til fyrirtækja
- Upplýsingarmiðlun
- Nemendabókhald
- Afgreiðsla og bókhald
- Innleiðing Innu
- Licted evrópuverkefni
- Próftaka háskólanema og annarra á Hólmavík og Patreksfirði
- Sérverkefni

Með samantekt þessari leggur Fræðslumiðstöð Vestfjarða fram gögn um starfsemi ársins 2018 og drög að starfsemi ársins 2019. Þar sem samantektin er unnin samkvæmt ákvæðum samnings sem grundvallaður er á lögum um framhaldsfræðslu er megin áhersla í samantektinni á þau áform sem miðstöðin hefur á sviði framhaldsfræðslunnar.

Stjórn Fræðslumiðstöðvar Vestfjarða árið 2018

Stjórn Fræðslumiðstöðvar Vestfjarða er skipuð fimm fulltrúum. Þrjú aðalfulltrúar og þrjú til vara eru kosnir á aðalfundi fulltrúaráðs, einn aðalfulltrúi og einn til vara eru tilnefndir af skólanefnd Menntaskólans á Ísafirði og þá á formaður fulltrúaráðs sjálfkrafa setu í stjórn og er varaformaður fulltrúaráðs varamaður hans. Stjórnin skiptir með sér verkum.

Stjórn Fræðslumiðstöðvar Vestfjarða skipa nú:

- **Jón Reynir Sigurvinsson**, formaður, Menntaskólanum á Ísafirði
- **Ragnheiður Ása Ingvarsdóttir**, Félagi opinberra starfsmanna á Vestfjörðum
- **Arnheiður Jónsdóttir**
- **Kristján G. Jóhannsson**, Vinnuveitendafélagi Vestfjarða
- **Nancy Bechtloff**, Náttúrustofu Vestfjarða

Varamenn stjórnar:

- **Sif Huld Albertsdóttir**, Byggðasamlagi Vestfjarða um málefni fatlaðs fólks
- **Ásdís Birna Pálsdóttir**, Verkalýðsfélag Vestfirðinga
- **Einar Valur Kristjánsson**, Útvegsmannafélagi Vestfjarða
- **Margrét Birkisdóttir**, Atvinnuþróunarfélagi Vestfjarða
- **Hildur Halldórsdóttir**, Menntaskólanum á Ísafirði

Á milli aðalfunda hélt stjórnin fimm bókaða fundi á árinu 2018 - 2019.

Fulltrúar Fræðslumiðstöðvar í öðrum stofnunum

Fræðslumiðstöð Vestfjarða á aðild að Háskólasetri Vestfjarða og Starfsendurhæfingu Vestfjarða. Eftirtaldir eru fulltrúar miðstöðvarinnar á aðalfundi Háskólaseturs og ársfundi Starfsendurhæfingar:

Háskólasetur Vestfjarða: Aðalmaður Dagný Sveinbjörnsdóttir og varamaður Elfa Hermannsdóttir.

Starfsendurhæfing Vestfjarða: Aðalmaður Elfa Hermannsdóttir og varamaður Sigurborg Þorkelsdóttir.

Starfsfólk Fræðslumiðstöðvar Vestfjarða árið 2018

Í lok árs 2018 voru 10 fastir starfsmenn hjá Fræðslumiðstöð Vestfjarða. Á ársgrundvelli voru stöðugildin 6,05.

Á árinu urðu þær breytingar hjá starfsfólki Fræðslumiðstöðvar Vestfjarða að í fyrsta skiptið við miðstöðina er starfandi menntaður náms- og starfsráðgjafi í fullu starfi, Helga Konráðsdóttir. Einnig er nú starfandi hjá miðstöðinni pólskumælandi starfsmaður, Barbara Maria Gunnlaugsson.

Starfsfólk Fræðslumiðstöðvar Vestfjarða árið 2018 var:

- Barbara Maria Gunnlaugsson, verkefnastjóri, 30% starfshlutfall janúar - ágúst, 80% starfshlutfall frá 1. september.
- Dagný Sveinbjörnsdóttir, verkefnastjóri, 80% starfshlutfall febrúar–júlí, annars 50%.
- Elfa Svanhildur Hermannsdóttir, forstöðumaður, 100% starfshlutfall.
- Elzibeta Pawluczuk, ræsting, 25% starfshlutfall.
- Helga Konráðsdóttir, verkefnastjóri, 100% starfshlutfall. Hóf störf 1. ágúst.
- Ingibjörg Benediktsdóttir verkefnastjóri á Ströndum og Reykhólum, 50% starfshlutfall frá janúar – september, þá 30% hlutfall.
- Kristín Pétursdóttir, bókari, 20% starfshlutfall.
- Eva Dögg Þorsteinsdóttir, verkefnastjóri í Vesturbyggð og Tálknafirði, 50% starfshlutfall janúar - júlí 2018.
- Rut Einarsdóttir, verkefnastjóri í Vesturbyggð og Tálknafirði, 50% starfshlutfall. Hóf störf 1. október.
- Sigurborg Þorkeldsdóttir, verkefnastjóri, 100% starfshlutfall.
- Sólveig Bessa Magnúsdóttir verkefnastjóri, 50% starfshlutfall.

Kennarar og leiðbeinendur

Stór hluti af starfsemi Fræðslumiðstöðvar Vestfjarða byggist á vinnu verktaka sem sjá um kennslu námskeiða og námsleiða. Verktakar sjá líka um að vera matsaðilar í raunfærnimati.

Fræðslumiðstöðin leggur mikla áherslu á að þeir sem kenna séu sérfræðingar á sínu sviði. Til dæmis hefur miðstöðin átt í góðu samstarfi við kennara Fisktækniskólans til þess að kenna á námskeiðum fyrir starfsfólk í fiskvinnslum. Þótt miðstöðin sæki stundum kennara út fyrir svæðið þá er lagt mikið upp úr því að fá til okkar hæfa kennara sem búa á Vestfjörðum. Með því er verið að nýta þá þekkingu sem til er á svæðinu, byggja upp reynslu og skapa atvinnu.

Árið 2018 voru verktakar hjá miðstöðinni hátt í 80 talsins og meiri hluti þeirra búsettur á Vestfjörðum.

Fyrrum nemendur og reynsla þeirra



Okkur þótti við hæfi að í þessari ársskýrslu myndum við eiga samtalið við fyrrum nemendur. Einn af þeim er Guðbjörn Páll Sölvason, betur þekktur sem Bubbi sem hefur bæði verið nemandi og starfsmaður hjá Fræðslumiðstöðinni. Við báðum Bubba að segja okkur frá sér og gefum honum orðið:

Aðdragandinn að því að ég komst í tengsl við Fræðslumiðstöðina var að ég slasast úti á sjó milli jóla og nýárs 2009. Ég vissi að það væri ólíklegt að ég færi aftur til sjós. Það tók mig á annað ár að gróa sára minna. Ég var ekki tilbúinn að hætta að vinna. Ég fór í viðtal til Hörpu

Kristjánsdóttur í Starfsendurhæfingu Vestfjarða og það um hjálpið til að komast á vinnumarkaðinn aftur. Ég er víst sá elsti sem þar hefur farið í gegn. Ég byrjaði á námskeiðum hér, hjá Fræðslumiðstöð Vestfjarða. Það var mjög skemmtilegt að fara og setjast á skólabeck 65 ára, eftir að hafa lokið námi í Stýrimannaskólanum árið 1966.

Mig minnir að það hafi verið í mars 2011 að Smári Haraldsson sem þá var forstöðumaður Fræðslumiðstöðvarinnar hafi kallað mig til viðtals. Ég neita því ekki að hjartað sló nokkrum slögum hraðar en venjulega þegar ég settist inni á skrifstofuna hans. Það var ekkert að óttast, Smári með sinni alúð bauð mér hlutastarf sem fælist í því að halda utan um tilraun sem Siglingastofnun, Fræðslumiðstöðin og leigurnar sem leigja út báta til sjóstangaveiði (frístundaveiðimenn) stæðu að. En það var að koma á fót einskonar könnun til að kanna kunnáttu hjá þeim sem ekki væru með réttindi til að stjórna bátunum sem leigðir væru til sjóstangaveiða. Þetta hefur svo orðið að þjónustu sem ég í samvinnu við Fræðslumiðstöðina hef séð um undanfarin sumur og er að fara af stað núna aftur. Ég hef líka séð um námskeið, en aðalstarf mitt hefur verið að sjá um námskeið sem tengd eru sjómennsku. Síðan 2012 hef ég kennt smáskipanám og prófað verklegt og bóklega skemmtibátapróf. Ég kenni núna 12m smáskipa nám undir hatti Tækniskólans sem semja prófin og fara yfir þau.

Það sem er eftirminnilegt úr starfinu er þegar ég stóð í fyrsta skiptið frammi fyrir nemendum í smáskipanámi, þ.e. fyrsti hópur úr 10. bekk grunnskólans. Þá hugsaði ég „úti hvað ertu nú búinn að koma þér?“

Ég mæli hiklaust með fullorðinsfræðslu. Það hafa komið menn í nám til mín sem hafa slæma reynslu að menntakerfinu, jafnvel ekki lokið grunnskóla. Þeir hafa þá haft þá skoðun á sjálfum sér

að þeir geti ekki lært. En eftir að hafa hafið nám hér þá hafa þeir blómstrað. Fullorðinsfræðsla hefur opnað leiðir til náms og fyllt fólk sjálfstrausti.

Fræðslumiðstöð Vestfjarða er góður vinnustaður þar hef ég þroskast mikið. Ég hef fengið að takast á við mörg mál. Sum sem mér hafa fundist erfið. En þá hef ég fengið að gera mistök og síðan fengið hjálp hafi ég leitað eftir henni. Það sem ég vil benda öðrum nemendum og starfsfólki á er: Að takast á við öll mál að heiðarleika og festu. Það er gott eftir á að hafa gengið nokkrum skrefum fram en ég þorði. Og vera maður sjálfur það gerir það enginn fyrir mann.

Annar nemandi sem hefur líka tengst okkur í gegnum vinnu sína er Jakob Einar Úlfarsson. En hann hefur bæði verið nemandi og svo umsjónarmaður tölvukerfis Fræðslumiðstöðvarinnar. Við leyfum Einari að segja sjálfum frá:



Reynsla mín af Fræðslumiðstöðinni er æðisleg. Þar er gott fólk sem tekur manni fagnandi þegar maður kemur í heimsókn hvort sem maður er að sækja námskeið eða bara að kíkja í heimsókn. Eitt skiptið þegar ég kom inn á Fræðslumiðstöðina spurði Sibba mig hvort ég hefði áhuga á að koma í raunfærnismat sem væri á tilraunastigi í samstarfi við Framvegis og Tækniskólann. Á þeim tíma hafði ég ekkert verið að hugsa um menntun eða spá í að láta meta kunnáttu mína. Ég kunni bara það sem ég kunnti og var sáttur með það. Ég sagði líka bara „já já hví ekki“ og sló til. Ferlið gekk vel fyrir sig. Svarami sjálfsmati, fór í viðtal og fékk á endanum metnar 66 einingar sem dugði til að útskrifast á tölvubraut á Tækniskólanum. Það fannst mér svolítið töff. Eftir það fékk ég þvítíka menntabólu og sótti mér alls konar námskeið.

Ég myndi hiklaust mæla með þjónustunni og vil hiklaust sjá meiri og aukna þjónustu í þessum málum.

Þegar Einar eða Eins eins og hann er kallaður var spurður hvort hann hefði einhver heilræði fyrir aðra segir hann: *Eins og Shia LaBeouf sagði í frægu youtube myndbandi „Hverju ertu að bíða eftir. GERÐU ÞAÐ BARA“. Margir mikla þetta fyrir sér og halda að þetta sé tímafrekt. Það er það ekki. Þú ræður hvað þú gerir eftir raunfærnismatið.*

Starfsstöðvar og starfsaðstaða

Fræðslumiðstöð Vestfjarða er með starfsstöðvar á þremur stöðum á Vestfjörðum.

Ísafjörður

Miðstöðin leigir rúmlega 300 fermetra húsnæði af Vestra ehf. á 1. hæð að Suðurgötu 12. Aðstaðan samanstendur af tveimur kennslustofum, fjórum skrifstofurýmum og sameiginlegu rými. Einnig hefur miðstöðin í nokkur undanfarin ár haft aðgang að lítilli kennslustofu á sömu hæð sem hægt hefur verið að nýta eftir þörfum. Það mun breytast árið 2019 vegna endurskipulagningar á húsnæði. Húsgögn í kennslustofum eru komin til ára sinna. Tölvur sem ætlaðar eru nemendum er einnig komnar til ára sinna og þarfnast endurnýjunar. Rúmlega helmingur af nemendatölvum var tekinn úr notkun árið 2018 þar sem þær voru ekki lengur boðlegar til kennslu. Fjarfundabúnaður miðstöðvarinnar hefur verið töluvert nýttur til kennslu undanfarin ár og er þá yfirleitt kennt á Ísafirði og nemendur staðsettir á Hólmavík og/eða Patreksfirði. Honum hefur nú verið lagt þar sem þróunin er í þá átt að meira er farið að nota venjulegar tölvur og hugbúnað sem heitir Zoom. Háskóli Íslands hefur verið að innleiða Zoom í sinni kennslu og gaf Fræðslumiðstöðinni 3 leyfi til að nýta í starsfemi sinni. Það virkar þannig að nemendur mæta þá í stofu í tölvunni í gegnum Zoom sem þeir fá uppgafið.

Hólmavík

Fræðslumiðstöðin er með aðstöðu á þriðju hæð í þróunarsetrinu á Hólmavík. Í húsnæðinu er aðstaða til að taka á móti nemendum sem koma í próf en síðusta ár voru framkvæmd 27 háskólapróf á Hólmavík. Á fyrstu hæð hússins er salurinn Hnyðja sem Fræðslumiðstöðin getur nýtt sem kennsluáðstöðu. Þar er einnig námsver.

Patreksfjörður

Þekkingarsetrið SKOR veitir Fræðslumiðstöðinni aðstöðu á Patreksfirði. Í SKOR er námskeiðsaðstaða fyrir litla hópa og einnig fjarfundabúnaður til að geta tekið þátt í fjarkenndum námskeiðum sem og aðstaða til að taka próf hvort sem er háskólapróf eða framhaldsskólapróf. Síðasta ár voru tekin 42 próf á Patreksfirði.

Rekstur Fræðslumiðstöðvar Vestfjarða

Rekstur Fræðslumiðstöðvar Vestfjarða hefur verið þungur í þónokkur ár. Miðstöðin hefur verið rekin með tapi undanfarin ár. Árið 2018 varð hins vegar viðsnúningur í rekstri þegar menntamálaráðuneytið veitti miðstöðinni styrk í lok árs 2018 upp á 5 milljónir króna fyrir utan hefðbundin auka styrk upp á 5 milljónir. Það fjármagn hefur nýst beint inn í framhaldsfræðsluna til að halda uppi starfsemi og þjónustu í dreifðum byggðum.

Einnig hafa orðið aukin umsvif með aukinni sölu á námskeiðum og verkefnum eins og Fræðslustjóra að láni.

Árið 2018 endaði með hagnaði upp á 10,9 milljónir.

Formlegir samstarfsaðilar

Mennta og menningarmálaráðuneytið

Fræðslumiðstöð Vestfjarða og mennta- og menningarmálaráðuneytið gerðu með sér samning dagsettan 18. desember 2014 og rann hann út í lok árs 2018. Framhald á samningnum var gert fyrir árið 2019 en einungis til eins árs. Til stóð að auglýsa styrkinn sem samningurinn byggir á en nú er víst að slíkt verður ekki. Í samningnum frá 2014 er kveðið á um þá þjónustu sem Fræðslumiðstöðin á að veita. Þar segir:

Fræðslumiðstöðin mun vinna að markmiðum framhaldsfræðslulaga nr. 27/2010 með því að reka miðstöð framhaldsfræðslu á Vestfjörðum; greina þarfir fyrir fræðslu og bjóða upp á ráðgjöf, raunfærnimat og námskeið fyrir markhópa, þ.á.m. bjóða fólki með erlend móðurmál íslenskukennslu. Þjónusta á sviði framhaldsfræðslu skal veitt og þróuð í samstarfi meðal annars við Fræðslumiðstöð atvinnulífsins, Fræðslusjóð og aðra hlutaðeigandi aðila. Fræðslumiðstöðin mun vera með fjarnáms- og kennsluaðstöðu á Vestfjörðum vegna framhaldsfræðslu og þjónustu við nemendur á framhaldsskólastigi eftir því sem þörf er á og fjárhagur leyfir.

Úthlutun til Fræðslumiðstöðvarinnar á fjárlögum ársins 2018 voru 19,2 milljónir og síðan kom viðbótarframlag upp á tæpar 5 milljónir. Í lok árs 2018 fékkst viðbót við það framlag upp á 5 milljónir. Samtals varð því viðbótarframlíð upp á 10 milljónir.

Fræðslumiðstöð atvinnulífsins – Fræðslusjóður

Fræðslumiðstöð atvinnulífsins (FA) er einkahlutafélag í eigu Alþýðusambands Íslands, Samtaka atvinnulífsins, BSRB, fjármála- og efnahagsráðuneytis og Sambands íslenskra sveitarfélaga. FA er með þjónustusamning við mennta- og menningarmálaráðuneytið annars vegar og símenntunarmiðstöðvarnar hins vegar. Samningurinn við símenntunarmiðstöðvarnar rann út um áramótin 2015/2016. Verið er að vinna að nýjum þjónustusamningi sem byggir á nýjum skilmálum sem samþykktir eru af mennta- og menningarmálaráðherra en sú vinna hefur dregist þar sem verið er að endurskoða framhaldsfræðslulögin.

Fræðslusjóður ráðstafar þeim framlögum sem Alþingi ákveður í fjárlögum hverju sinni. Úthlutanir Fræðslusjóðs greinast í meginatriðum í þrennt samkvæmt úthlutunarreglum sem ráðherra staðfestir:

- framlög til fræðsluaðila til að mæta kostnaði við kennslu og námskeiðahald
- framlög til að mæta kostnaði við raunfærnimat og náms- og starfsráðgjöf
- styrkveitingar til nýsköpunar- og þróunarverkefna í framhaldsfræðslu.

Fræðslumiðstöðin sækir á hverju ári um úthlutun úr sjóðnum. Fyrir árið 2018 fékkst fjármagn fyrir 5,1 milljón fyrir raunfærnimati, 18,7 milljónum til kennslu vottaðra námsleiða og 5,36 milljónir til náms- og starfsráðgjafar. Sótt var um viðbótarúthlutun til Fræðslusjóðs og fengust þá 800.000 aukalega til náms- og starfsráðgjafar og aukalega 3 milljónir til kennslu vottaðra námsleiða.

Háskólasetur Vestfjarða

Fræðslumiðstöð Vestfjarða og Háskólasetur Vestfjarða eru með samning sín á milli um að á Hólmavík og Patreksfirði sjái miðstöðin um framkvæmd prófatöku fyrir háskólana í landinu. Árið 2018 annaðist Fræðslumiðstöðina 69 próf fyrir Háskólasetrið.

Fjölmennt

Fræðslumiðstöðin er með þjónustusamning við Fjölmennt – símenntunar og þekkingarmiðstöð um sí- og endurmenntun fyrir fólk með fötlun, 20 ára og eldra og hefur sá samningur verið endurnýjaður árlega. Í samningnum er tekið fram að miðstöðin eigi að bjóða upp á fjölbreytt námstækifæri fyrir fólk með fötlun á Vestfjörðum. Haldin voru 9 námskeið fyrir fatlaða á árinu 2018.

Virk og Starfsendurhæfing Vestfjarða


Hlutverk Starfsendurhæfingar Vestfjarða er að veita einstaklingum starfsendurhæfingu sem hafa verið utan vinnumarkaðar vegna veikinda, slysa eða annarra aðstæðna og þurfa stuðning við endurkomu á vinnumarkaðinn. Fjármögnun SEV er að mestu í gegnum samstarfssamning við VIRK starfsendurhæfingarsjóð. Fræðslumiðstöðin er stofnaðili að Starfsendurhæfingu Vestfjarða. Mikið samstarf er við Starfsendurhæfinguna um þátttöku í námskeiðum og við námskeiðsframboð við einstaklinga í starfsendurhæfingu.

Gæðavottun

Tilvist gæðakerfis með áherslu á nám fullorðinna er eitt af skilyrðum þess að teljast viðurkenndur fræðsluaðili í fullorðinsfræðslu af mennta- og menningarmálaráðuneytinu. Fræðslumiðstöðin hefur verið með EQM gæðavottunina (European Quality Mark) frá árinu 2013. EQM er er gagnsætt matsferli fyrir fræðsluaðila til að meta starfshætti sína út frá viðurkenndum gæðaviðmiðum. EQM tekur mið af gæðum þjónustunnar sem fræðsluaðili veitir, innri gæðastjórnun og verklagsreglum fræðsluaðila og hvernig núverandi starfshættir samræmast viðurkenndum gæðaviðmiðum. Fræðslumiðstöð atvinnulífsins er með samning um EQM-úttektir og fer slík úttekt fram á þriggja ára fresti. Fyrirhugað er að Fræðslumiðstöðin fari í úttekt á árinu 2019.


Námið

Fræðslumiðstöð Vestfjarða stóð fyrir 160 námskeiðum árið 2018. Til samanburðar voru námskeiðin 142 árið 2017. Fjölgunin á milli ára er langmest í réttindanámi þar sem námskeiðin eru 31 í stað 15 árið áður. Þessi mikla fjölgun helgast fyrst og fremst af endurmenntunarnámskeiðum fyrir atvinnubílstjóra. Þá var nokkur fjölgun íslenskunámskeiða en þau voru 36 árið 2018 í stað 27. Fjöldi almennra námskeiða stendur í stað sem og námskeið fyrir fólk með fötlun. Nokkur fækkun var hins vegar í vottuðum námsleiðum, úr 16 í 10.



Fjöldi þátttakenda

Samanlagður fjöldi þátttakenda í öllu námi hjá Fræðslumiðstöð Vestfjarða árið 2018 var 2075 sem er töluverð aukning frá árinu 2017 þegar þátttakendur voru 1.772. Skipt eftir svæðum þá voru þátttakendur á norðanverðum Vestfjörðum 1.391, í Vesturbyggð og Tálknafirði 386, á Ströndum og Reykhólum 145 og 70 með skráð heimilisfang utan Vestfjarða.




Fjölgun þátttakenda helst að nokkru leyti í hendur við fjölgun námskeiða en er þó umfram það. Um nokkurt skeið var meðalfjöldi þátttakenda á námskeiðum um 10 manns. Árið 2017 voru um það bil 12,5 þátttakendur að meðaltali á hverju námskeiði en árið 2018 var meðalfjöldinn 13 þátttakendur. Þarna hefur mikið að segja fjölmenn námskeið fyrir fiskvinnslu- og fiskeldisfyrirtæki sem haldin voru á árinu en einnig hafa bílstjórnánámskeiðin töluvert að segja þar sem mörg þeirra voru nokkuð fjölmenn.


Um helmingur þátttakenda voru að sækja almenn námskeið (1.027 talsins), 583 eða tæplega 30% voru í réttindanámi, 281 voru skráðir á íslenskunámskeið, 122 tóku þátt í vottuðu námi og þátttakendur á námskeið fyrir fólk með fötlun voru 62.

Fjöldi nemendastunda

Nemendastundir eru mælikvarði á umfang fræðslustarfs en þar er búið að margfalda fjölda nemenda á hverju námskeiði með fjölda kenndra kennslustunda á sama námskeiði. Starfsmarkmið fyrir árið 2018 voru 28.500. Markmiðið náðist og vel það þar sem nemendastundirnar enduðu í rétt rúmlega 34.000. Hins vegar er þetta fækkun frá árinu 2017 þegar nemendastundirnar voru rúmlega 37.000.



Fækkun nemendastunda á milli 2017 og 2018 má að verulegu leyti rekja til þess að nemendastundum í vottuðu námi fækkað um rétt rúmlega 4.000, úr 14.623 í 10.579. Vottaðar námsleiðir eru að öllu jöfnu lengri en annað nám hjá Fræðslumiðstöðinni og því vegur fjöldi þeirra og umfang alltaf nokkuð þungt þegar fjöldi nemendastunda er skoðaður. Árið 2018 var einnig nokkur fækkun nemendastunda í almennum námskeiðum, úr 9.410 í 7.390. Hins vegar fjölgaði nemendastundum í íslensku um tæplega 2.200 og í réttindanámi um tæplega 500.




Aldurskipting þátttakenda

Þátttakendur dreifast nokkuð jafn á hvert 10 ára aldursbil frá 25 ára og til 64 ára, um það bil 20%. Ekkert eitt aldursbil sem sker sig áberandi úr en þó má geta þess að aldurshópurinn 55-64 ára er hlutfallslega stærstur. Það skýrist að einhverju leyti af þeim mörgu og fjölmennu námskeiðum fyrir atvinnubílstjóra sem haldin voru á árinu en meðalaldur á þeim námskeiðum er nokkuð hærri en almennt gerist.

Flokkun þátttakenda eftir kyni

Frá fyrstu tíð hefur verið töluverður kynjahalli þegar þátttaka eftir kyni er skoðuð, körlum í óhag. Nú gerðist það í fyrsta skipti árið 2018 að karlar voru hlutfallslega fleiri en konur þótt ekki muni miklu, 51% karlar og 49% konur. Sú staðreynd að fleiri karlar en konur sóttu námskeið hjá Fræðslumiðstöðinni árið 2018 má fyrst og fremst rekja til endurmenntunarnámskeiða fyrir atvinnubílstjóra þar sem þátttakendur voru nánast alfarið karlar.


Hlutfall kynja á námskeiðum 2014-18



Skipting eftir búsetu

Eðli málsins samkvæmt hefur umfang námskeiðahalds og þátttaka á námskeiðum verið langmest á norðanverðum Vestfjörðum þar sem mannfjöldinn er mestur. Árið 2018 er þar engin undantekning. Hlutfallslega fækkar þátttakendum aðeins á sunnanverðum Vestfjörðum miðað við árið á undan en fjölgar lítilsháttar á Ströndum og Reykhólum.

Hlutfallsleg skipting þátttakenda á námskeiðum eftir búsetu 2014-2018




Vottaðar námsleiðir

Á árinu 2018 voru alls 10 hópar í vottuðum námsleiðum hjá Fræðslumiðstöð Vestfjarða. Mikill meirihluti þessa náms var kennt í samstarfi við ákveðin fyrirtæki eða fyrir Vinnumálastofnun en minna var um að námsleiðir væru auglýstar og treyst á „lausatrafíkk“. Eins og árið á undan hafa fiskvinnslu- og fiskeldisfyrirtæki á svæðinu verið dugleg að nýta sér *Grunnnámskeið fyrir fiskvinnslufólk* auk þess sem eitt fyrirtæki bauð hluta starfsmanna sinna að sækja *Meðferð matvæla*. Vinnumálastofnun var hins vegar með áherslu á að gera atvinnuleitendum kleift að bæta færni sína í íslensku og bauð skjólstæðingum sínum að sækja *Landnemaskóla* og námið *Íslensk menning og samfélag* sem hefur í raun tekið við af Landnemaskólanum.


Námsleið	Hópar
Aftur í nám	1
Grunnnámskeið fyrir fiskvinnslufólk	5
Íslensk menning og samfélag	2
Landnemaskólinn	1
Meðferð matvæla	1

Samanlagður fjöldi þátttakenda í vottuðum námsleiðum voru 122 og nemendastundirnar 10.579. Þetta er nokkur fækkun í nemendastundum frá síðustu árum ef frá er skilið árið 2016 sem var sambærilegt við árið í ár. Þessi fækkun endurspeglar bæði að námsleiðirnar voru færri, 10 hópar nú í samanburði við 16 á síðasta ári en einnig að námsleiðirnar sem kenndar voru árið 2018 voru tiltölulega stuttar miðað við margar aðrar námsleiðir. Sem dæmi þá er *Meðferð matvæla* aðeins 60 kennslustundir og *Grunnnámskeið fyrir fiskvinnslufólk* 72 kennslustundir, en þetta með stystu námsleiðum innan vottaða námsins.



Réttindanám

Fræðslumiðstöðin á í samstarfi við nokkra aðila varðandi réttindanám og fer það eftir eftirspurn hverju sinni hvað er í boði. Í mörg ár hefur verið samvinna við Guðmund Einarsson um kennslu í vélgæslu, við Menntaskólann á Ísafirði um viðbótarnám í vélgæslu og við Skipstjórnarskóla Tækniskólans um smáskipanám. Auk þess hefur miðstöðin verið með leyfi frá Samgöngustofu frá 2017 til að kenna endurmenntunarnámskeið sem atvinnubílstjórar þurfa að sækja til þess að endurnýja atvinnuréttindi sín.




Alls voru þátttakendur í réttindanámi 583 og hafa þeir aldrei frá upphafi Fræðslumiðstöðvarinnar verið svona margir. Til samanburðar voru þátttakendur í réttindanámi árið 2017 alls 199 og var það þá með því mesta sem hafði verið. Eina skýringin á þessum mikla fjöldi eru endurmenntunarnámskeið atvinnubílstjóra. Áður en farið var að kenna þau námskeið voru yfirleitt á bilinu 4-10 réttindanámskeið á hverju ári. Bílstjóranámskeiðin hófust 2017 og það ár voru réttindanámskeiðin 15. Árið 2018 töldust hins vegar 31 námskeið til réttindanáms. Nemendastundunum fjölgaði einnig og urðu 6.911 árið 2018. Hlutfallslega er fjölgunin þar ekki nærri eins mikil og fjölgun nemenda enda eru bílstjóranámskeiðin fremur stutt námskeið, 7 kennslustundir hvert. Atvinnubílstjórar þurfa að endurnýja réttindi sín á fimm ára fresti og hafa þá lokið endurmenntunarnámskeiðum. Gera má ráð fyrir að flestir atvinnubílstjórar á Vestfjörðum hafi nú lokið endurmenntun og því verði ekki sami fjöldi námskeiða eða nemendastunda í réttindanámi næstu ár.

Íslenskunámskeið fyrir útlendinga

Kennd voru 36 námskeið í íslensku fyrir útlendinga árið 2018 sem er aukning um 9 námskeið frá árinu áður. Fræðslumiðstöðin fékk úthlutað fjármagn frá Rannís fyrir sem nemur 24 námskeiðum sem hvert eru 30 kennslustundir. Síðar fékkst viðbótarfjármagn fyrir 4 slíkum. Fræðslumiðstöðin er því í raun að kenna fleiri íslenskunámskeið en fjárframlög hins opinbera gerir ráð fyrir til þess að mæta eftirspurn og þörf.

Fleiri námskeið skiluðu töluverðri aukningu bæði í fjölda þátttakenda og fjölda nemendastunda. Alls voru 281 þátttakandi árið 2018 til samanburðar við 207 árið áður og nemendastundirnar urðu 8.430 til samanburðar við 6.144. Mikilvægt er að ríkið bregðist við aukinni eftirspurn með auknu


fjárframlagi í þennan mikilvæga málaflökk. Enda er það ein af forsendum fyrir þátttöku í íslensku samfélagi að hafa tök á málinu.



Aukningu á milli ára má meðal annars rekja til þess að árið 2018 tóku sveitarfélögin á norðanverðum Vestfjörðum á móti hópi flóttamanna frá Sírylandi og Írak. Samið var við Fræðslumiðstöðina um íslenskukennslu fyrir fullorðna fólkið í hópnum og voru nokkur námskeið haldin sem hluti af þessu verkefni. Þá hefur áhrif að mikil vakning var í íslenskukennslu á sunnanverðum Vestfjörðum meðal annars vegna þess að starfsmaður miðstöðvarinnar á því svæði gat og vildi taka að sér íslenskukennslu. Með því voru íslenskukennarar á svæðinu orðnir tveir í fyrsta skipti. Loks má nefna að með ráðningu á pólskumælandi starfsmanni er orðið auðveldara að ná til ákveðins hóps sem þarf á íslenskukennslu að halda.

Almenn námskeið

Eins og fram hefur komið er stærstur hluti þátttakenda í námi hjá Fræðslumiðstöðinni að sækja það sem kallað er almenn námskeið. Í þessum flokki eru bæði tólmstundanámskeið og námskeið sem líta má á sem endurmenntun og starfsþróun. Samanlagður fjöldi þátttakenda árið 2018 var 1.027 og nemendastundirnar 7.390.



Í samanburði við fyrra ár þá fækkaði bæði þátttakendum og nemendastundum þótt fjöldi námskeiða stæði í stað. Að hluta til skýrist þetta af því að meiri áhersla hefur verið á styttri námskeið sem eru kannski hálfur dagur. Það tengist að nokkru þeirri áherslubreytingu sem hefur verið unnið að undanfarin tvö ár á þann hátt að framboð á starfstengdum námskeiðum hefur aukist á kostnað tólmstundanámskeiða. Þessa breytingu má meðal annars rekja til samstarfs við fyrirtæki á svæðinu um gerð fræðsluáætlana en svipað hefur einnig verið að gerast hjá öðrum símenntunarmiðstöðvum þar sem stöðugt meiri áhersla er á að þjóna atvinnulífinu. Atvinnulífið virðist frekar vilja senda sitt fólk á styttri námskeið en lengri.

Fullorðinsfræðsla fatlaðra

Á námskeiðum fyrir fólk með fötlun urðu nemendastundirnar á árinu 758 og þátttakendurnir 62. Þetta er fjölgun nemendastunda en þátttakendafjöldinn er nokkurn veginn sá sami á milli ára. Ákveðin áherslubreyting varð í framboði með því að bjóða sérstaklega upp á námskeið fyrir yngsta aldurshópinn en þátttakendum í þeim hópi hefur fjölgað. Árið 2018 var í fyrsta skipti haldið námskeið fyrir fólk með fötlun annars staðar en á Ísafirði þegar boðið var upp á matreiðslunámskeið á Hólmavík.

Þjónusta við fyrirtæki

Á árinu 2018 hefur Fræðslumiðstöðin haldið áfram með þá línu sem lögð var 2017 að leggja mikla áherslu á að efla tengsl við fyrirtækin á svæðinu, bæði með því að bjóða upp á starfstengd námskeið og aðra þjónustu eins og verkefnið Fræðslustjóri að láni.

Fræðslustjóri að láni

Verkefnið Fræðslustjóri að láni byggist á að lána mannauðsráðgjafa til fyrirtækja sem er sérhæfður í vinnustaðfræðslu og óformlegri menntun. Ráðgjafinn fer yfir fræðslu- og þjálfunarmál fyrirtækisins, dregur fram það sem vel er gert, gerir eða dýpkar greiningu á þörfum fyrirtækisins og samhæfir við önnur námskeið eða viðurkenndar fræðsluleiðir innan óformlega fræðslukerfisins. Afurð verkefnisins er sérsniðin fræðsluáætlun þar sem búið er að leggja línurnar í fræðslumálum

marga mánuði fram í tímann. Alls var unnið að þremur fræðslustjóraverkefnum á árinu 2018 í samvinnu við fyrirtæki á Vestfjörðum.

Fræðsla í fyrirtækjum

Fræðslumiðstöðin hefur verið að sækja í sig veðrið varðandi starfsþróunarnámskeið. Starfsþróunarnámskeið eru styrkt af sjóðum verkalýðssamtaka og geta fyrirtæki fengið u.þ.b. 75% af kostnaði endurgreitt vegna slíkra námskeiða. Slík námskeið eru oft sérsniðin að þörfum fyrirtækisins og getur fræðslan verið hvort sem er á vinnustaðnum eða í húsakynnum Fræðslumiðstöðvarinnar. Mörg af þeim starfsþróunarnámskeiðum sem Fræðslumiðstöðin heldur koma í framhaldi af fræðslustjóra verkefnum inn í fyrirtækjum.

Samningar við sjóði

Í upphafi árs ruddi Fræðslumiðstöð Vestfjarða brautina fyrir aðrar símenntunarmiðstöðvar þegar gerður var tilraunasamningur milli miðstöðvarinnar og sjóðanna Sveitamenntar og Ríkismenntar. Það þýddi að allir starfsmenn sem vinna hjá ríki eða sveitafélagi og greiða til Verkalýðsfélags Vestfirðinga eða Verkalýðs- og sjómannafélags Bolungarvíkur geta sótt starfstengd námskeið sér að kostnaðarlausu þ.e. sjóðurinn greiðir fyrir sitt félagsfólk og Fræðslumiðstöðin sækir námskeiðsgjöldin beint í sjóðinn. Mikil ánægja hefur verið með þetta fyrirkomulag og er vonandi að fleiri sjóðir fylgi í kjölfarið og geri samninga fyrir sína félagi.

Þjónusta við Vinnumálastofnun Vestfjarða

Fræðslumiðstöðin vinnur mikið með Vinnumálastofnuninni á Vestfjörðum og er samstarfið í tengslum við ráðgjöf, úrræði og annað sem stofnunin er að leita eftir hverju sinni. Árið 2018 voru kenndar tvær vottaðar námsleiðir fyrir atvinnuleitendur auk íslenskunámskeiða.

Náms- og starfsráðgjöf/Hvatningarviðtöl

Sú breytinga varð árið 2018 að ráðinn var náms- og starfsráðgjafi í fast starf við miðstöðina en einnig hefur einn starfsmaður lokið framhaldsnámi sem ACC markþjálfari. Saman sinna þessir starfsmenn hvatningar- og þróunarsamtölum til ráðþega auk þess sem nú er hægt að bjóða upp á náms- og starfsráðgjöf. Frá árinu 2017 hefur verið boðið upp á hvatningarviðtöl á pólsku og var mikil ánægja með það hjá fyrirtækjum. Alls voru tekin um 407 hvatningarviðtöl á árinu.

Raunfærnimat

Framlag Fræðslusjóðs til raunfærnimats á árinu 2018 var 5.089.750 kr. Úthlutað var til fiskvinnslu og fiskeldis, félagsliða og iðngreina í samstarfi við IÐUNA. Alls fóru 7 manns í gegnum raunfærnimat. Ákveðið var að flytja hluta af raunfærnimatinu yfir á árið 2019 en raunfærnimatsárið telst vera 18 mánuðir og er því fram á mitt ár 2019.

Þróunarverkefni

Fræðslumiðstöðin leiddi Erasmus+ samstarsverkefni á árinu 2018. Verkefnið heitir LICTED in rural communities sem útleggst á íslensku sem Læsi og tæknilæsi í fullorðinsfræðslu í dreifðum byggðum. Tilgangur verkefnisins er að skoða hvernig kennarar geti aðstoðað nemendur sem eru með litla

færni í læsi eða upplýsingatækni. Á árinu hafa verið haldnir 2 fundir, á Spáni og í Þýskalandi. Á þeim fundum var verið að vinna með afurðir verkefnis þ.e. efni fyrir kennara í fullorðinsfræðslu sem þeir geta nota með nemendum sínum til að styðja þá í sínu námi. Heimasíða verkefnisins er www.licted.eu. Alls var úthlutað rúmum 11 milljónum króna sem skiptast á milli þeirra fjögurra fræðsluaðila sem taka þátt.

Sótt var um í þróunarsjóð Fræðslusjóðs atvinnulífsins um gerð námsefnis um velferð fiska í tengslum við laxeldi. Fengust 3 milljónir úthlutaðar úr sjóðnum eða hæsti styrkur sem er veittur. Samið var við Ann Cecile Hilling um gerð námsefnisins. Verkefninu mun ljúka um mitt ár 2019.

Ákveðið var í lok árs 2018 að reyna fjarkennslu á íslenskunámskeiði fyrir Pólverja, þ.e. kennarinn var staddur í Póllandi en nemendurnir voru staddir í húsnæði Fræðslumiðstöðvarinnar á Ísafirði. Námskeiðið þótti einstaklega vel heppnað og voru nemendur sammála um að það væri eins og kennarinn væri í stofunni þó að hann væri raun staddur í Póllandi. Unnið verður með frekari útfærslur á þessu 2019.

Nýjungar árið 2018

Í lok árs var innleiddur nýr hugbúnaður til fjarkennslu í Fræðslumiðstöðinni sem kallast Zoom. Hann leysir af hólmi gamlan fjarfundarbúnað sem krafðist meiri tækja og móttökubúnað en Zoom sem einungis þarf venjulega tölvu. Háskóli Íslands hefur innleitt hjá sér þennan búnað og hvatti símenntunarmiðstöðvar til að taka hann upp. Má segja að Fræðslumiðstöð Vestfjarða hafi brotið ísinn þar og var fyrsta símenntunarmiðstöðin til að innleiða þennan hugbúnað í sínu starfi.

Starfsáætlun 2019

Starfsmarkmið fyrir árið 2019

Á árinu 2019 setur Fræðslumiðstöð Vestfjarða sér að ná eftirtöldum markmiðum í starfsemi sinni.

- Heildartekjur verði umfram heildargjöld.
- Fjöldi nemendastunda í vottuðum námsleiðum, íslensku fyrir útlendinga og námi fyrir fatlaða verði ≥ 18.000 .
 - Þar af verði fjöldi nemendastunda á norðursvæði Vestfjarða ≥ 11.000 .
 - Þar af verði fjöldi nemendastunda á suðursvæði Vestfjarða ≥ 1.500 .
 - Þar af verði fjöldi nemendastunda á Reykhólum og Ströndum ≥ 500 .
 - Þar af verði fjöldi nemendastunda í fjarkennslu eða dreifnámi ≥ 5.000 .
- Fjöldi nemendastunda í öðru námi verði ≥ 10.500
 - Þar af verði fjöldi nemendastunda á norðursvæði Vestfjarða ≥ 7.000 .
 - Þar af verði fjöldi nemendastunda á suðursvæði Vestfjarða ≥ 2.000 .
 - Þar af verði fjöldi nemendastunda á Reykhólum og Ströndum ≥ 500 .
 - Þar af verði fjöldi nemendastunda í fjarkennslu eða dreifnámi ≥ 1.000 .
- Fjöldi viðtala hjá náms- og starfsráðgjafa verði ≥ 450 .
- Fjöldi þátttakenda í raunfærnimati í fisktækni/fiskeldi verði ≥ 15
- Fjöldi þátttakenda í raunfærnimati í samstarfi við lðuna ≥ 5 .
- Fjöldi þátttakenda í raunfærnimati í almennri starfshæfni ≥ 10 .
- Fjöldi þátttakenda í raunfærnimati í félagsliðabru verði ≥ 10 .
- Þátttakendur í raunfærnimati verði frá öllum svæðum Vestfjarða.
- Fjöldi útseldra klukkustunda í fræðslugreiningum (MARKVISS) verði ≥ 400 .
- Fræðslumiðstöð ljúki Verkefnastjórn í Evrópuverkefninu LICTED
- Tryggja frekara samstarf við sjóðina Ríkismennt og Sveitamennt.
- Ná samningum við fleiri starfsmenntasjóði.
- Að þróa fjarkennslunámskeið í íslensku fyrir útlendinga
- Að Innleiðing á Innu ljúki á árinu 2019
- Að ljúka EQM+ Vottun á árinu 2019

Fjárhagsáætlun 2019

Fjárhagsáætlun byggir á þeim starfsmarkmiðum sem Fræðslumiðstöð Vestfjarða hefur sett sér á árinu 2019 og þeim forsendum sem fyrir þeim liggja. Sá fyrirvari er á áætluninni að ekki hefur verið ákveðið með úthlutun Fræðslusjóðs fyrir árið 2019, en stór hluti af starfseminni byggir á úthlutun Fræðslusjóðs.

Fyrsta janúar 2019 voru fastir starfsmenn 9 í um það bil 6,25 stöðugildum. Ekki er reiknað með breytingu á stöðugildum fyrir árið 2019. Miðstöðin mun áfram reka mannaðar starfsstöðvar á þremur stöðum á Vestfjörðum.

Heildartekjur Fræðslumiðstöðvar Vestfjarða árið 2019 eru áætlaðar um 112,7 milljónir og heildargjöld um 108,1 milljónir króna. Líkt og undanfarin ár er framhaldsfræðsla og annar rekstur aðskilinn í fjárhagsáætlun.

Nánari sundurliðun er í meðfylgjandi töflum. Þar sem hvorki er gert ráð fyrir tækjakaupum eða fjárfestingum á árinu 2019 og þar sem miðstöðin skuldar ekkert, sýnir taflan jafnframt áætlaðar breytingar á efnahag miðstöðvarinnar árið 2019.

Áætlaðar tekjur árið 2019.

Framhaldsfræðsla

Annar rekstur

Tekjur	Krónur	tekjur alls -annar rekstur	Krónur	
Framlag af fjárlögum	20.000.000	Námskeiðsgjöld af alm.námsk.	14.000.000	
Framlag samþ. Af fjárlaganefnd	3.000.000	Námskeiðsgjöld af réttinda námi	6.000.000	
Viðbótar framlag af fjárlögum	5.000.000	Marviss ráðgjöf	8.000.000	
Samningur um kennslu vottaðra námsleiða	18.190.000	Styrkir til þróunarstarfa	2.500.000	
Samningur um náms- og starfsráðgjöf	5.922.000	Þjónusta við fjarnema	1.500.000	
Raunfærnimat	5.089.750	Útleiga á húsnæði og búnaði	1.000.000	
Styrkur til íslenskukennslu	4.000.000	Aðrar tekjur	2.150.000	
Greiðsla þátttakenda til íslenskukennslu	6.480.000			
Greiðsla þátttakenda í vottuðum námsleiðum	3.600.000			
Aðrar tekjur	2.800.000			
Kennsla fatlaðra	3.000.000			
Tekjur alls -frh.fræðsla	77.081.750	Tekjur alls -annar rekstur	35.150.000	112.231.750

Áætluð gjöld árið 2019.

Framhaldsfræðsla

Annar rekstur

Gjöld		Gjöld		
Laun fastra starfsmanna	49.000.000	Laun fastra starfsmanna	11.000.000	
Laun verkefnaráðinna starfsmanna	14.000.000	Laun verkefna ráðinna kennara	10.000.000	
FS-netið	2.000.000	Ferðalög starfsm. Og kennara	1.500.000	
Rekstur stafsstöðva	6.500.000	Auglýsingar	300.000	
Ferðalög starfsm. Og kennara	1.500.000	Yfirstjórn og annar kostnaður	3.500.000	
Auglýsingar	300.000	Þróunarstörf	2.500.000	
Yfirstjórn og annar kostn.	3.500.000			
Ráðgjöf og raunfærnimat	2.500.000			
Gjöld alls	79.300.000		28.800.000	108.100.000
Tekjur umfram gjöld	-2.218.250		6.350.000	4.131.750

Vottaðar námsleiðir

Framlög Fræðslusjóðs til kennslu vottaðra námsleiða árið 2019 er 18.670.000 kr. eða það sama á árinu á undan. Þar sem ekki hefur verið úthlutað úr Fræðslusjóði þá er eingöngu hægt að ganga út frá forsendum fyrri ára. Áætlað er að kenna sex námsleiðir í níu hópum; samtals 729 klukkustundir (ath. hér er talað um klukkustundir en alls staðar annars staðar í skýrslunni eru notaðar kennslustundir. Ástæðan er sú að Fræðslumiðstöð atvinnulífsins er að færa sig yfir í að nota klukkustundir). Reiknað er með að meðaltali rúmlega 10 þátttakendum í hverjum hópi. Áætlað er að hluti námsleiðanna verði túlkaður yfir á önnur tungumál, svo sem Grunnnámskeið fyrir fiskvinnslufólk.

Vottaðar námsleiðir sem áætlað er að kenna árið 2019.

Námsleið	Hópar	Staður	Klst í heild	Kennt	VÖ18	HÖ18	Alls klst
Grunnnám fyrir fiskvinnslufólk	1	Ísafjörður	48	Öll	48		48
Meðferð matvæla	2	Ísafjörður	40	Öll	80		80
Kvikmyndasmiðja	1	Ísafjörður	80	Öll	80		80
Nám og þjálfun í alm. bóklegum gr.	1	Ísafjörður	200	Öll	150	50	200
MFA Námskrá	1	Ísafjörður	210	Öll	210		210
Sterkari starfsmaður	1	Ísafjörður	100	Öll			100
Grunnám f. heilbrigðisstarfsfólk 2	1	Patreksfjörður	40	Öll		40	40
Túlkun	4		328				
Alls kennsla	8				568	90	658

Náms- og starfsráðgjöf

Framlag Fræðslusjóðs til náms- og starfsráðgjafar á árinu 2019 er áætlað 5.360.000 kr. auk 630.000 kr. í akstur og ferðalög, sem er það sama og árið 2018. Áætlað er að þetta dugi fyrir u.þ.b. 400 viðtölum.

Raunfærnimat

Framlag Fræðslusjóðs til raunfærnimats á árinu 2019 er 6.582.000 kr. sem er sama og á fyrra ári og skiptist þannig á eftirtaldar greinar:

- Liðagreinar.
- Fiskvinnsla og fiskeldi.
- Iðngreinar í samstarf við IÐUNA.
- Almenn starfshæfni.

Af árinu 2018 voru færðar 4.800.250 kr. til raunfærnimats, en raunfærnimatsárið spannar í raun 18 mánuði.

Áætlaður fjöldi þátttakenda í raunfærnimati 2019 eru a.m.k. 30 þátttakendur og áætlaður staðinn einingafjöldi í raunfærnimati a.m.k. 1150 einingar.

Íslenska fyrir útlendinga

Fræðslumiðstöð Vestfjarða gerir ráð fyrir að kenna 28 námskeið í íslensku fyrir útlendinga á árinu 2019. Hvert námskeið er 30 kennslustundir og er gert ráð fyrir a.m.k. 8 þátttakendum á hverju námskeiði.

Samstarf við Fjölmenn

Á árinu 2019 er áætlað að kenna fólki með fötlun 120 stundir og að fjöldi þátttakenda verði 60. Að auki er fyrirhugað að nota hluta af framlagi Fjölmennar til að greiða fyrir nám með stuðningi.

Lokaorð

Fræðslumiðstöð Vestfjarða er einn af máttarstólpum samfélagsins á Vestfjörðum. Það eru ekki allir sem gera sér grein fyrir hvað hún skiptir miklu máli. Fólki finnst að hún eigi að vera til staðar en fæstir vilja kosta hana - allir vildu Lilju kveðið hafa og hampa henni á tillidögum. Frá því að ég hóf störf hef ég sé að það hefur gætt misskilnings um starfsemina þar sem margir halda að ríkið kosti reksturinn að fullu. En það er ekki rétt. Vissulega fáum við styrk frá ríkinu sem skiptir okkur miklu máli. Meira en helmingur rekstursins er hins vegar sjálfsaflafé. Starfsfólk Fræðslumiðstöðvarinnar þarf því að vera duglegt að vera úti á akrinum. Sökum þess tel ég okkur vera í nánu sambandi við fyrirtæki og sveitafélög á svæðinu, sem er vissulega af hinu góða. Okkar daglega starf er að greina þarfir svæðisins, spá í framtíðina og reyna að sjá hana fyrir. Við verðum að geta verið tilbúin að bjóða upp á námskeið með skömmum fyrirvara t.d. þegar verður skyndilegt stopp í fiskvinnslu. Fyrirtæki og sveitafélög á Vestfjörðum eiga miklar þakkir skyldar fyrir að versla í heimabyggð og sýna okkur það traust að fá að mennta starfsfólk þeirra. Fyrir það þökkum við starfsfólkið af heilum hug því við vitum manna best að þessi viðskipti eru lífæð Fræðslumiðstöðvarinnar.

Árið 2018 vann Fræðslumiðstöðin náð með Ísafjarðarbæ við heildstæða fræðslugreiningu fyrir allt starfsfólk sveitarfélagisins. Það er von okkar að sú mikla vinna sem við unnum með Ísafjarðarbæ og því frábæra fólki eigi eftir að skila okkur nánara samstarfi. Að miðstöðin eigi eftir að geta sinnt fræðsluþörf þeirra á komandi árum. Framundan er vinna hjá Fræðslumiðstöðinni að samþætta fræðslu fyrir sveitarfélögin á svæðinu og bjóða upp á öll þau námskeið sem talið er þörf á.

Starfsfólk Fræðslumiðstöðvarinnar finnur fyrir auknum áhuga hjá fólki sem flutt hefur hingað erlendis frá og vill sækja íslenskunámskeið. Það þarf að huga að því fólki og hvernig er best að standa að þeim námskeiðum. Við höfum því verið í þróunarvinnu hvernig hægt sé að mæta því fólki betur á þeim stað sem það er stadd. Stór hluti hópsins er pólskumælandi og það var því mikill fengur í því að fá pólskumælandi starfsmann sem getur átt samskipti á þeirra móðurmáli. Einnig er mikilvægt að sá starfsmaður er líka fyrirmynd annarra sem vilja vera þátttakendur í íslensku samfélagi.

Viðsnúningur varð í rekstri Fræðslumiðstöðvarinnar á árinu 2018. Til þess að geta slíkt þarf sterkt og gott starfsfólk og samvinnu þeirra á milli. Ég vil nota tækifærið hér, þar sem ég læt senn af störfum sem forstöðumaður að þakka samstarfsfólki mínu fyrir þá miklu vinnu og alúð sem það sýnir í starfi sínu.

Fræðslumiðstöð Vestfjarða er með einstakt hjarta. Hún brennur fyrir að mennta fólk á Vestfjörðum og stuðla að því að sú þekking sem Vestfirðir þurfa sé til staðar. Að hægt sé að sækja þekkingu á heimaslóðum. Fræðslumiðstöðin, ef hún fær að dafna áfram, á eftir að spila sitt hlutverk í endurmenntun og stuðningi við starfsfólk í stofnunum og fyrirtækjum í tengslum við fjórðu iðnbyltinguna með því að gefa menntunartækifæri til fólks sem þyrfti annars að sitja eftir.

Með einlægri von um að Fræðslumiðstöðin og Vestfirðir allir eigi eftir að vaxa og dafna um ókomna framtíð.

f.h. Fræðslumiðstöðvar Vestfjarða,

Elfa Svanhildur Hermannsdóttir, forstöðumaður.